

# NOS MORTS

26. 9. 1972

## **† Valentin Deragisch, Sedrun (1914–1972)**



(Corr.) Enteifer 2 meins ha la mort fatg reha raccolta en Tujetsch: 7 personas ha ella raffau, nunditgont la gronda dolur e tristezia ch'ella ha cheutras caschunau. Ils 26 d'october ha ella sdrappau Valentin Deragisch ord questa veta suenter cuort, mo dir combat. Il defunct ha buca giu ina sanadad da fier. Il davos temps eran novs simtoms d'ina malsogna semussai. Mo ne-gin vess sminau, ch'el fetschi schi spert. Ton pli dolorus ei perquei il comiau!

Cura ch'in carstgaun banduna nus per adina, se-presenta sia veta avon nies spért. Nuslein buca descriver ella liung e lad, m'obein skizzar ella cuortamein e far menziun da zacontas qualitads che paran significativas per il defunct.

Staus ord da scola, empren Valentin Deragisch da scrinari. Suenter gl'emprendissadi fa el in temps pratica e fundescha lu sez ina fatschenta ch'el ha — entras lavur, energia, perseveranza e vasta egliada — menau cun grond success. Havend las premissas per ina existenza, marida el. Ensemen cun sia fideivla consorta Maria trai el si ina gronda e respectabla famiglia, dalla quala el era loschs — e quei cun raschun. Speciala satisfacziun ha el giu, cura che siu fegl Silvio ha celebrau messa nuviala 1967. Quei di tarlischava el.

Sper la lavur professiunala s'interessava il Valentin era dalla politica. El ei staus en differetas cumissiuns da vischnaunca e dad uniuns. Special dun veva el da finanzas. Perquei eis ei

buca stau da sesmarvegiliar ch'el ei vegnius ele-gius ella cumissiun communala da quens, alla quala el ha apparteniu tochen la mort.

Sco ulivaziun dalla lavur e dallas obligaziuns deva il Valentin bugen in scart troccas, ni steva si leger cun ses camerats e convischins. El era in um da cumpignia ed el ei semussaus bia gadas sco amitg viers ses cumpogns. Sia beinvilentscha demussava el era, cura ch'ins mava ina ga ni l'autra a casia. Mai vess el schau ir ins, senza dar ina buna marenda ni enqualga schizun in bien puscheagn. Quei agir dat perdetga dil bien cor dil car defunct. Quella qualitad ulivescha segir siu temperament, enqualga furibund ed anetg.

Avon ver in onn ha il Valentin surdau sia fatschenta a siu fegl Ervin. El era cuntents d'ussa astgar trer flad empau pli lev. El veva denton mintgaton il sentiment dad esser danvonz. Segir senza raschun! Sia gronda experienza, sia collaboraziun e ses cuseggs eran fetg beinvegni ed el vegn a schar anavos ina largia nunremplazzabla. Specialmein la famiglia cun aunc giuvens affons vegn a sentir il meglier la sperdita da lur bien bab. Era nus schein encrescher per quei um luvrus, da bien cor e da cumpignia! Possi la can-zun «Cristus ei oz si levaus», cantada alla fin dallas funcziuns da bara, esser per tuts consolazioni e confiert!